

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Mau
Ava'e Atoa.

Te hoo: E Piti Toata i te Matahiti.

Nu. 2

Febuare 1935

Mat. 29


*O te tiaoro atoa hoi i te i'oa o Iehova ra, e hope roa ia i te
ora. Roma 10: 13.*

Davida O. MAKE.

I te ono no Atopa i mairi a'enei ua tae mai, i nia i teie
taeae, te utu'a e te haamaitairaa o te tae mai i nia i
te mau tamarii a te Atua o tei haapao i te mau faaueraa, e
tei rave itoito i ta'na ra ohipa.

I roto i te Amuiraa rahi, no te Ekalesia, i faatiahia i Roto
Miti, Utaha, i te 6 no Atopa i mairi a'enei, ua faanuuhia o
Reubena Tarati, te Tauturu Piti, ei Tauturu Hoê ei mono no
Anatone W. Ivine tei pohe i roto i te ava'e Setepa, e ua mai-
tihia o Davida O. MAKE ei Tauturu Piti i roto i te Peresi-
deniraa Rahi no te Ekalesia, e ua farii maitaihia oia ma te
mauruuru rahi e te mau melo atoa no te Ekalesia.

Ua fanau mai o Davida O. Make i Huntsville, Utaha, i te
8 no Setepa i te matahiti 1873. E tamaiti oia na Davida Ma-



*Te hoho'a teie no te Aposetolo ra o Davida O. MAKE o tei
ma'ititihia e tei faataahia, i te 6 no Atopu i mairi a'enei, ei Tau-
tahi Piti i roto i te Peresideniraa Matamua no te Ekalesia.*

ke) metua) e no Jeanette Evans Make. I to'na apîra ua rave oia i te ohipa i nia i te faaapu a to'na metua; e mea au roa ua'na i te faahoro i te puaahorofenua, te au e te tairi popo.

Ua haere oia i te haapiiraa teitei e ua roaa mai, ia'na, te mau parau atoa no taua haapiiraa ra.

I roto i te ava'e Atete, i te m. 1897, ua maitihia oia ei Orometua e ua haere oia i te fenua Baratane ia poro haere i te Evanelia. I te ava e no Tenuare, i te m. 1900, ua faaipoi-po oia ia Emma Riggs, e ua fanau mai ta raua e toohitu tamarii, e toono teie e ora nei. I te matahiti 1903 ua maitihia oia ei Orometua faatere i te hoê Haapiiraa teitei, o Weber Academy, e ua rave oia i te reira ohipa e tae roa'tu i te matahiti 1908. Mai te matahiti 1908 e tae noa'tu i te matahiti 1922, ua faatere oia i te mau haapiiraa, no te Ekalesia, e ua faatere atoa oia i te mau haapiiraa Sabati no te tîti i Weber.

I te 8 no Eperera 1906 ua maitihia oia ei Aposetolo no te Ekalesia. I roto i te matahiti 1921-1922 ua haere o Davida, raua o Hugh J. Canona, e hi'opoa i te mau Misioni, no te Ekalesia, i te ao nei, i rapae i te fenua Amerika, e 13 ava'e tei pau ia raua i te haaatiraa i te mau Misioni e e 62.500 mai-le te roaraa o to raua tere. A haamana'o na outou, ua tae mai raua, i Tahiti nei, i te matahiti 1921. I te ava'e no Novema 1922 ua maitihia oia ei Peresideni no te Misioni i Europa e e mea manuia roa ta'na ohipa i reira, ua tupu roa te ohipa a te Fatu i raro a'e i ta'na faatereraa. I te matahiti 1924 ua hoi atu oia i Roto Miti, e ua rave â oia i te ohipa e au no to'na ra toroa i rotopu i te mau tîti no te fenua Amerika.

E taata herehia, teie taeae, e te mau taata tei farerei ia'na ra e noa'tu e e taata veve e aore ra e taata tao'a rahi, hoê â to raua faito i mua ia'na ra.

Ua au to'na oraraa i te hoê faito no tatou, ia rave itoito tatou i te ohipa mai ia'na te huru, ia haapao tatou i te mau ture, e te mau faaueraa, e horoa mai te Atua i te utu'a mai-tai no te haamauruuru ia tatou.

E te riro ia'na te rê, e te tapea i ta'u parau e tae noa'tu i te hopea ra, e horoa'tu vau i te mana no'na i nia iho i te mau fenua. Apokalupo 2: 26.

Papaihia e Le Roy Mallory.

Te Mau Oro'a Te Ravehia I Roto I Te Hiero.

TUATIRAA

Te oro'a bapetizoraa, i te taata e ora nei, no te taata tei pohe ra, o te hoê ia oro'a hanahana rahi e te vahî i faataahia no te raveraa i taua ohipa ra o roto ia i te Hiero Mo'a ra. I te anotau o Paulo, te Aposetolo, ua bapetizohia te feia ora ra no te feia i pohe ra; te na ô maira Paulo: "*Aore ra, eaha ihora te feia i bapetizohia no te feia i pohe ra, ia ore te feia i pohe ra ia tia faahou? eaha ihoa ratou i bapetizohia'i no tei pohe ra?*" 1 Korinetia 15: 29.

Te tumu i hamanihia'i te mau Hiero, no te raveraa ia i te hoê mau ohipa tei faatiahia ia ravehia i roto ra. "*Te hacre vave atu nei hoi au i to'u Hiero. B. F. 36: 8; 42: 36; B. F. S. 35: 3; Malaki 3: 1. — Ia faatia to'u ra mau taata i te hoê fare no'u, e eiaha roa ratou e faatia i te hoê mea viivii ia ô atu i roto ia ore te reira ia haaviiviihia, e vai ia to'u ra hanahana i nia iho i te reira; oia ia, i reira atoa hoi Au, e hae-*

re atu hoi Au i roto i te reira, e te feia atoa o tei mā te aau ra ia haere atu i roto, e ite ia ratou i te Atua." B. F. 97: 15-17; 84: 5; 94: 8, 9; B. F. S. 94: 4.

Ia patuhia teie nei fare i to'u ra i'oa, ia faaite Au i ta'u mau oro'a i reira, i to'u ra mau taata." B. F. 124: 40; B. F. S. 107: 13.

"Ia hamani outou i te hoê fare, e i roto i te reira fare te opua nei Au ia faauruhia ratou, o ta'u i maiti, i te mana no nia mai." B. F. 95: 8, 9; 38: 32, 38; B. F. S. 88: 2.

"E mea tia, ia'u, ia farii ta'u mau peresibutero matamua i to ratou horoaraa mo'a, mai nia mai, i roto i to'u nei fare o ta'u i faaue ia faatiahia i roto i to'u ra i'oa." B. F. 105: 33; 109: 35; B. F. S. 102: 10.

"E te horoa'tu nei a ia outou, o te mau rave ohipa mata-mua i roto i teie nei basileia hopea, i te hoê faaueraa: ia haaputuputu outou ia outou iho, e ia haamau ia outou iho, e ia faaineine ia outou iho, e ia haamo'a ia outou iho, oia ia, ia tamâ i to outou mau aau e ia horoikia to outou mau rima e te avae hoi, i mua ia'u, ia tamâ vau ia outou; ia faaite atu vau i to outou Metua, e i to outou Atua, e i to'u Atua, ua mā outou i te toto no teie nei u'i rave hara, ia faatupu vau i tei parauhia mai, i teie nei parau rahi hopea ia outou i te taime tei au ia'u." B. F. 88: 70, 74, 75, 116; 95: 7; B. F. S. 85: 20.

"Oia mau ta'u e parau atu nei ia outou, ta outou mau faa-tahinuraa, e ta outou mau horoiraa, e ta outou mau bapeti-zoraa no te feia i pohe ra, ta outou ra mau putuputuraa hahano ra, e ta outou mau parau faaiteraa no ta outou mau tusia, i te mau tamariki a Levi, e ta outou ra mau ohipa mo'a a te Atua iroto i ta outou ra mau vahi mo'a roa ra, i reira ta outou mau paraparauraa, e ta outou ra man ture e te faaotiraa pa-

rau, ei haamataraa no te mau heheuraa e te faatumuraa no Ziona, e no te hanahana, te tura e te horoaraa i ta'na atoa ra mau haapaoraa, e ua faataahia te reira mau mea ei oro'a mo'a no to'u fare mo'a." B. F. 124: 39; 109: 89; B. F. S. 207: 12.

" Nafea ta outou mau horoiraa e fariihia'i e Au, maori ra ia haapaohia te reira, e outou, i roto i te hoê fare o tei patuhia e outou no to'u ra i'oa." B. F. 124: 37; B. F. S. 107: 12.

" Na te Peresibeni e a ore ra na te Peresibutero peresideni o te Ekalesia e haapao i teie oro'a horoiraa avae. Ia haamatahia te reira na roto i te pure, e ia oti te amuraa i te pane e te inuraa i te uaina ei reira oia e tatua'i ia'na iho mai tei faaitesia i roto i te pene hoê ahuru ma toru no te parau ta Ioane i papai no'u." B. F. 88: 139-141; B. F. S. 85: 46. Ioane 13: 4-15.

" Ua faauehia hoi e, i roto ia Ziona e to'na mau mataei-na, e i Ierusalem, taua nau vahi ta'u i haapao ei haapuraa, ei reira ta outou mau baptizoraa no te feia i pohe ra." B. F. 124: 36; B. F. S. 107: 11.

" Aore roa hoi e vahi i itehia, i te ao nei, e tia'i ia'na ia haere mai e ia faaho'i faahou mai i tei mo'e, e a ore ra, tei afai-e-hia e Ana, oia hoi te iraa no te Autahu'araa: aore hoi e vahi e vai nei te hoê fonata, oia hoi e pani baptizoraa i te ao nei, ia baptizohia ratou, ta'u feia mo'a, no te feia i pohe ra, no te mea no to'u fare hoi te reira oro'a." B. F. 124: 28-30; 128: 13; B. F. S. 107: 10.

" Ia faaafaro maitai-hia te mau parau i papahia ra, ia tia ia vaiho i te reira i roto i te mau vairaa parau i roto i to'u Hiero mo'a, ia haamauhia ei haamana'oraa i tera u'i e i tera u'i, te na reira maira Iehova Sabaoa." B. F. 127: 9; 128: 24; B. F. S. 109: 6.

“Te haapaoraa no te fare tei faanehenehehia no te perezideniraa no te haapiiraa, no te mau peropheta, tei faatiahia no te haapiiraa'ia ratou i te mau mea'toa e faufaahia'i ratou e tae noa'tu i te mau feia toroa atoa no te Ekalesia, * ia haamatahia na te mau tahu'a rahi e tae noa'tu, i raro, i te mau diakono ra.” B. F. 88: 127-138; 90: 7, 8; 95: 10, 17; B. F. S. 85; 39.

Te Mau Hiero no teie Tau.

“E ore teie nei u'i e hope i te mou, e faatiahia'tu te hoê fare na te Fatu, e e tapoihia oia i te hoê ata, e te reira ata o te hanahana ia o te Fatu, e e i roa hoi te fare i te reira (*hanahana*).” B. F. 84: 5; B. F. S. 83: 2; 1 Arii 8: 10.

“E pûpû te mau tamaroa a Mose e te mau tamaroa atoa hoi a Aarona i te tufaa tia e te tusia, i roto i te fare a te Fatu, ia faatiahia hoi te reira fare, na te Fatu, i roto i teie nei u'i, i nia i te vahi i haamo'ahia e au' mai tei haapaohia e au. B. F. 84: 31; B. F. S. 83: 6.

E tuatihia teie nei parau.

TE EVANELIA I TE ANOTAU HOPEA NEI.

Maiti ihora te Atua ia Iosepha Semita (Metua) no te faatiaraa i te Evanelia i roto i teie anotau hopea nei; ua haapii maitehia oia, e te hoê melahi, i tera tau e i tera tau, i te mau parau tumu no te Ekalesia o tei faauehia ia'na e, e faatia.

Ua tamatahia oia e ua râmâ hia oia na roto i te mau ravea atoa ra, ua haaatihia oia i te mau hamani inoraa e rave rahi mai te haamataraa i to'na faaiteraa i te mau parau i haa-piihia mai ia'na ra, oia hoi, i faatoroahia na oia e Ioane Bapetizo i te Autahu'araa a Aarona, e i muri a'e, ua faatoroahia ihora oia, i te Autahu'araa a Melehizedeka, i raro a'e i te rima o Petero, Iakobo e Ioane.

Mai te au i te tuatapaparaa parau ra, e Peropheta ia oia e e Hi'o e e iriti parau êê, hou oia i faatoroahia'i ei Aposetolo; ua tiavaruhia oia, e to'na ra mau enemî, i tera vahi e i tera vahi e ua tapeahia oia i na ava'e e rave rahi mai te faatae orehia i mua i te aro o te mau haavâ. Ua faatitiro o Iosepha raua o Haeramu, i ta raua parau tapû, i to raua iho toto, e i to raua poheraa'tu, mana'o ihora te mau enemî o te Ekalesia e, ua mou te *Haapuoraa Momoni* ia ratou.

Te tiaturi nei ra matou e, te toto o te feia mo'a ra, o te vai puna ia o te Ekalesia *Momoni*. Te na ô maira te parau i papaihia i roto i te Buka Fafau: e to raua toto hara ore i nia i te tahua o te fare tapearaa i Caratate, e titiro aano ia te reira i tamauhia i nia i te hapaoraa *Momoni* o te ore e tia, i te hoê tiripuna o te ao nei, ia faaore i te reira." Ua papu roa ia tatou, i teie nei e, teihea te parau mau e no vai taua peropheta ra o Iosepha Semita (Metua).

O ta te varua e faaite mai o ta'u ia e faaite atu ia outou: " O te feia itoitoe o tei faatia i te pupu o tei mau i te mana i raro mau a'e i te upoo o te Ekalesia ra, e o tei tuuhia'tu te mana o te Atua ia ratou, oia hoi te mau Aposetolo ei patu i te Ekalesia e ei faaau i te mau ohipa atoa no te reira i rotopu i te mau nuuaa atoa ra, e o tei horoahia te mana ia ratou i te mau taviri iritiraa i te mana i To'u ra basileia i nia i na otia e maha no te fenua nei, e i muri a'e i te reira ia faatae atu i ta'u nei parau i te mau taata atoa e vai nei; e o tei mai-

tihia
to i t
e o te
Semi
mau
veve
tu ra
i te a
mai i
Vilia
i te f
Ekale
pea M

Ua
su M
hoi,
ti Ap
maiti
ra ua
Ua
raa i
Ia

Ino
te tan
hotu
ra.
te bu
tapo

tihia na roto i te hoê heheuraa no ô mai i te Atua ra, na roto i te parau a to'na ra peropheta, o Iosepha Semita metua, e o tei faatoroa-ana'e-hia i raro a'e i te faatererae o Iosepha Semita te peropheta ei mau Aposetolo; e o tei haapau i te mau matahiti o to ratou ra oraraa, i teie nei ao, i roto i te veve e te mau ati e rave rahi i te raveraa i te ohipa a te Fatu ra; e o tei riro ei feia parau tia i roto i te Ekalesia e i mua i te aro o to ratou ra Peropheta e to ratou ra Atua, e i mûri mai i te taparahi raa hia o Iosepha metua, ia au i te parau a Viliamu Mareko ra, oia hoi, ua faarirohia ratou, i muri a'e i te feruri maite ra hia, ei pupu tia mau no te faatere i te Ekalesia a Iesu Mesia i te Feia Mo'a i te Mau Mahana Hopea Nei.

Ua na reira noahia i te faatereraa i roto i te Ekalesia a Iesu Mesia i te Feia Mo'a i te Mau Mahana Hopea Nei, oia hoi, ia pohe te peresideni e riro te pupu no te Ahuru ma Pititi Aposetolo ei faatere no te Ekalesia e tae noa'tu i te taime e maitihia'i te hoê ei mono no te Peresideni i pohe ra, no reira ua vai noa te faatereraa aueue ore e tae roa mai i teie nei.

Ua pâpaihia teie nei maa parau rii no te haamaramaramaraa i te mau taata atca e, teihea te parau mau.

Ia orana outou i te aroha o te Heheuraa Apî.

Temuriaroha a Kuratahi,

Inaha, te na ô maira te Fatu sabaota ra, E faaite atu vau i te tamarîi a te taata e, e vahi iti poto e riro ai Lebanona ei aua hotu rahi e e man'ohia'i hoi te aua hotu rahi ei fenua ururaa ra. Ia tae i te reira mahana e faaroo ai te turi i te parau o te buka, e no te mea ua faaorehia te mohimohi e te pouri, matapo noâ iho te taata, e ite ia. 2 Nephi 27: 28-29.

Tei Hea Râ te ATUA ?

Te na ô maira te tahi haapiiraa na te tahi mau *Haa-paoraa*, tei te mau vahi atoa te Atua; te na ô maira vetahi e; ua î roa teie nei ao ia'na; te na ô maira vetahi e; e mea menemene te Atua no te mea e mea menemene teie nei ao.

Aue ia mau mana'o i te hape e ! Teihea ra te mana'o tia ! Teie: O Iesu iho, tei pou mai, mai te ra'i mai, na'na i faaite mai e, tei te ra'i te Atua, e ua haapii mai oia i te mau Aposetolo e, e na ô outou ia pure: *E to matou Metua i te ra'i ia raa to oe ra i'oa.*

E i to Iesu tia faahouraa mai, mai te pohe mai, ua parau maira oia ia Maria i Matetara e, a haere a faaite atu i te mau taeae e, te haere nei au i tau Metua, i to ratou Metua ra.

Aore maoti te Atua i te ao nei, tei te ra'i râ Oia.

Toae a Maire.

TE MAU PARAU API

Ua Taoto Rii.

I te oire ra i Chicago, Amerika, te vai ra te hoê vahine, o Patricia MAGUIRE to'na i'oa, tei taoto noa e 33 ava'e i te maoro. I te paura o taua na ava'e e 33 ra ua haamata oia i te araara i to'na nau mata e te faaroo i te parau ia paraubia'tu oia e to'na metua vahine. Te tiaturi nei to'na metua vahine e, e ora oia i taua mai taoto e e tia mai oia, i nia, ia tae i to'na mahana fanauraa. E ere anei i te mea maere tera huru taoto ?

E Aueueraa Fenua.

I roto i te ava'e no Titema i mairi a'enei, ua tupu te hoê aueueraa fenū puai roa i te fenua Honduras, Amerika i ropu. No te puai o te aueueraa o te fenua, ua mou roa e 3 oire huru, rahi e i teie nei te vai nei e 6,500 tātata ma te fare ore.

Parau Apî No Takaroa Ma.

Ua tae mai te parau faaite, no Takaroa mai, i te Heheuraa Apî, tei faaite mai e, i roto i te taurua raa rahi tei faatupuhia, i Fakarava, i te 11 no Novema i mairi a'enei, ua noaa te rê matamua no te tue popo, i te pūpū te U'i Apî, no Takaroa. No te mauruuru e te faahiahia o te mau tomite no taua taurua ra ua horoahia, e ratou, te hoê fetia, na te Ligue Maritime Coloniale Francaise, na taua pūpū ra te U'i Apî.

Ua na reira atoahia te Pūpū Pū, ua horoa'toa hia ta ratou fetia tei au i te tahi; na te Tavana Rahi i horoa te reira nau fetia na roto i te aniraa a te mau tomite no taua taurua ra. E ere anei i te mea nehenehe ?

Ua Paapaa I Te Auahi.

I te 7 no Titema i mairi a'enei, ua tupu te hoê auahi i roto i te fare pureraa no te Amaa, no te Ekalesia, i te oire ra i Ferron, Utaha. No te iti o te pape ua pau roa taua fare pureraa ra, e te mau mea atoa i roto ra, i te auahi. Ua faatiahia taua fare pureraa ra e 5 matahiti i mairi a'enei e ua pau e 55.000 tara moni amerika no te reira. Te faaite atoa hia mai nei e, 14 matahiti i mairi a'enei, ua pau atoa, i te auahi, te fare pureraa no taua Amaa ra.

E Mea Ino Mau Te Ava.

I te oire Portland, Amerika, ua pohe a'enei e hoê ahuru e ma hoê taa-ta e ua paruparu roa vetahi no te mea ua inu ratou i te ava tutui, oia hoi e ALCOOL tei ore i faaauhia no te inu. E ere ana'e to Tahiti nei tei pohe i te inuraa i tau huru ava ra, ua haere atoa taua peu maamaa ra i nia i te Papaa. O te hopea ihoa te reira o te taata o te inu i te ava, ia taero oia e inu noa oia i te mau huru ava atoa e tae noa'tu i te ava te haapohe ia'na.

Ua Iteahia.

Ua itehia i te tufaa fenua ra i Tuscon, Arizona, te hoê mau tino pohe tei vaimaitai na, mai tahito mai, no te mea ua miri hia taua mau tino ra mai te au i te mau raveraa a to Aiphiti. Ua faitohia taua mau tino pohe ra e ua itehia e ua mairi te 7 avae, i te teitei, ia ratou atoa; no reira te parauhia nei, e te mau taata paari no teie nei ao, ua vai, i taua tufaa fenua ra, i te mau tau tahito, te hoê nunaa taata rarahi e te aravihi i te mau mea atoa o te ao nei. E mau tapao faaite ana'e ia te reira e, e parau mau ana'e tei papaihia i roto i te Buka a Moromona.

E Taata Tei Mamu Noa.

Te vai nei te hoê taata Initia, o Ames IRANI to'na i'oa, tei tapu e, eita oia e paraparau faahou i te taata, e i teie nei ua pau e iva matahiti i to'na haapaoraa i ta'na parau fafau. E melo oia no te hoê haapaora o tei haamori i te mahana, o tei parauhia e Zoroastrian, e te tumu ua na reira oia no te mea ua feruri oia e, e mea faufaa ore ia paraparau.

E Fare Vairaa Moni Rahi Mau.

Te vai nei i te oire ia i Paris, Farani, te hoê fare moni rahi roa tei parau hia te BANQUE de FRANCE. Tei reira te vairaa o te rahiraa o te moni piru i te ao nei e ia ore te reira piru ia riro i te nana eia, ua heruhia te fenua, i raro a'e i taua fare moni ra, e ua hamanihia te mau piha e rave rahi no te vairaa i taua moni piru ra. Ua faanehenehe atoa hia, i reira, te mau ravea atoa no te parururaa i tau faufaa rahi ra, tae noa'tu i te maa e te mau mauhaa atoa e tia'i i na taata e 2.000 ia paruru i taua faufaa ra no na ava'e toru.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.